

Fundacion pa Combati Molester di Zonido cu cambio den directiva y ta lansa nan website



Thursday, 17 January 2013 12:35



0

Tweet

Share

Despues di 5 anja Enid Croes-Marugg, Presidente fundador di e Fundacion, a pasa e martiu di autoridad na e Presidente nobo Michael Bareño cu tambe tin varios aña caba den directiva di e Fundacion. Cu hopi interes e Fundacion ta move su mes continuamente pa tur loke ta regarda exceso di zonido y ta promove pa biba den tranquilidad sin e molester aki. Di e manera aki tambe por evita efectonan negativo ariba salud di hende cual por wordo causa pa exceso di zonido. Un di e aspectonan cu Fundacion ta haña importante ta pa midi e decibel di e zonido pa por detecta ora e yega un nivel cu por ta dañino pa salud en general. Entre otro e Fundacion ta tene un bon contacto cu Cuerpo di Polis cual instancia constantemente ta ricibi keho di ciudadanonan cu e volumen di zonido ta mucho halto ora tin fiesta/actividad di bisiña, na clubnan nocturno, plaza of cualkier otro localidad. Pa yuda midi ki ora en verdad e zonido ta mucho halto, Fundacion a hasi donacion di 4 aparato pa midi e nivel di zonido na Cuerpo di Polis. Tambe Fundacion a tene varios reunion cu ministernan concerni y otro organizacionan pa discuti e materia aki.

Fuera di midimento di zonido, Fundacion lo sigui enfatisa e necesidad di bin cu regulacionnan den cada permiso duna pa autoridad concerni na donjonan di club of organizadornan di fiesta, bar, clubnan etc. E permiso mester contene e maximo decibel y duracion permiti. Ciudadanonan tin derecho di por drumi sin estorbo di zonido exahera, cual por ta daniño pa nan salud.

E Presidente nobo Michael Bareño lo sigui guia e desaroyo di e metanan di e Fundacion cual lo por wordo sigui riba e website www.sbgaruba.com. E nomber di e website ta deriva di e nomber oficial di e Fundacion cu ta Stichting ter Bestrijding van Geluidsoverlast (SBG).

Fundacion ta di opinion cu ta deber social di cada ciudadano pa tene cuenta cu otro den tur sentido, especialmente ora di organiza actividadnan cu zonido halto cu por causa molester y daño na otro. Te awor tur trabao di Fundacion a conta cu un bon respaldo y acogida serca diferente sponsor fiho, menciona ariba e website, pero ta spera di por haña mas sponsor pa asina por sigui cumpli cu e trabao importante aki y asina logra pa nos hendenan por goza di nan tranquilidad.

Ban uni pa baha volumen, no hasi exceso di zonido y larga nos tur ban respeta tranquilidad di otro.